

Rapport da gestiun 2023 dil president dalla pleiv catolica romana s. Martin, Trun

Preziau sur Tomasz
Preziadas parochianas, preziai parochians

En miu rapport sco president dalla baselgia catolica romana s. Martin da nossa vischnaunca dundel a vos las necessarias informaziuns sur dil passau en nies cumin-baselgia duront igl onn d'uffeci vargau.

1. General

Suenter la pandemia era il basegns dalla populaziun da star ensemen da cuminonza, seigia quei ella veta privata aber era en baselgia, buca pli aschi ferm sco avon la pandemia. Dapi igl atun vargau havein nus saviu constatar che igl interess ei puspei carschius. Duront il di da suppa e las messas da Nadal e da pastgas havein nus giu fetg biaras personas che han priu part.

Il cussegl pastoral ha puspei organisau la messa campestra ell'Ogna. Tier quella messa han las giuvnas soras Scherrer e la cusarina Giulietta Barenius cantau ed aschia dau a quei eveniment ina nota tut speziala e solemna. Muort il grond engaschi dil Cussegl pastoral e da plirs voluntaris ha ei dau silsuenter gentar sil plaz da giugs. In grond Dieus paghi a tut ils gidonters.

Dil di da suppa, ch'il Cussegl pastoral ha medemein organisau, han varga 80 personas priu part. A quella caschun ei vegniu rimnau daners per in'uniun che segida cun personas impedidas ella Pologna. Isabelle Defuns, nossa presidenta dil Cussegl pastoral e catecheta zun preziada ha lu saviu surdar a sur Rafael ina biala summa da varga 2000.00 francs. Bien engraziament.

Ils 24 da december ha sur Tomasz festivau treis messas da Nadal. Allas 15:00 la s. messa en casa S. Martin, allas 17:00 ed allas 22:00 en baselgia parochiala a Trun. La messa dallas tschun ei puspei vegnida embellida cun il cant ed il giug da nadal dils affons. La secunda messa ei vegnida celebrada allas 22:00, quella ei vegnida embellida cul cant dal cor cecilian. Era cheu vi jeu buca tralaschar d'engraziar a tut ils gidonters che han possibilitau bialas e festivas messas da Nadal.

Gl' onn vargau ei la studia en connex cun differents cass ch'ei vegni surdurai sexualmein da representants dalla baslegia catolica svizra vegnida publicada. Varga 1000 cass ein vegni registrai e sin quei ha ei dau massa extradadas dalla baselgia catolica. En nossa pleiv ha ei dau igl onn vargau 7 extradadas.

Renovaziun dalla baselgia da Nossadunna dalla Glisch:

Sur dus onns ha la renovaziun dalla baselgia da Nossadunna dalla Glisch cuzzau ed ella ei vegnida finida cun cumpleina cuntentienscha. 2024 vegn aunc il plaz avon baselgia e la via tochen si tier il parcadi mess en in bien stand. Il plaz e la via s'audan per gronda part alla vischnaunca. Las vischinas ed ils vischins da Trun han dau suatientscha alla damonda da surpender ils custs. In grond Dieus paghi persuenter. Sco davos pass vegn la baselgia da Nossadunna puspei illuminada la sera e far ina grondiusa pareta si Caltgadira.

Igl atun 2024 duess igl entir project esser finius. Nus vegnin ad inaugurar la baselgia sco era il plaz e la via cun ina pintga fiasta il di che nus festivein era il num da Maria, ils 08 da settember.

Per anflar daners per la baselgia da Nossadunna ha ei duvrau bia engaschi, seigi quei d'anflar las dretgas adressas per tarmetter las brevs, da crear ina pagina d'internet, da crear in flyer per tarmetter allas casas en Surselva e da tarmetter mintgamai ina brev d'engraziament allas personas che han susteniu la renovaziun. Cun gronda premura ed engaschi ha nossa zun premurada secretaria Gabriela Vincenz fatg ina gronda part da quellas lavurs ed jeu less engraziari zun fetg ad ella persuenter.

a) Suprastonza

La collaboraziun denter la suprastonza ha funcziunau per mia cumpleina cuntentienscha. En 5 sedutas ei la suprastonza seradunada ed ha liquidau ils pensums adossai ad ella. Pensums delegai ad in ni

l'auter per liquidaziun (art. 24 dalla constituziun) ha il responsabel sligiau e sch'igl ei stau necessari ha la suprastanza sancziunau quella decisiun. La collaboraziun cun il cussegl pastoral cun si'iniziativa ed engaschada presidenta Isabel Defuns-Gamboni ha funcziunau grondius.

b) La pastoraziun

Grazia agl engaschi da nies zun preziau plevon sur Tomasz Piotr, mo era cun igl agid da tut ils auters gremis dallas pleivs e caplania en special la gronda lavur dil secretariat, dil cussegl pastoral e dallas catechetas ha la pastoraziun funcziunau era en quei onn per cumpleina cuntentienscha.

c) Instrucziun religiosa

Cun Isabelle Defuns-Gamboni, Rilana Cadruvi Scherrer e Stefan Bolli havein nus il cletg da haver treis catachets ch'ei fetg engaschai e che vegnan apreziati fermamein dils affons e dalla pleiv.

d) Veta e mort

Mintgin ha siu agen pensum cheu sin tiara. Quel entscheiva cun la naschientscha e finescha cul viadi en la perpernadad. Veta e mort stattan datier ina a l'autra. Duront il davos onn havein nus stuiu prender cumiau da caras concristianas e da cars concristians. Nus havein denton era saviu selegrar ensemen cun ils geniturs da novs battegiati.

Davos la statistica stattan muments grevs mo era uras legrevilas.

Battens	13
Premcommunicants	4
Nozzas	1
Extrada ord la baselgia	7
Mortoris	16

A tuttas defunctas e defuncts engrazieli jeu per il bien che nus havein astgau retscheiver dad els duront lur veta terestra. Allas famiglias en malencurada esprimin nus nossa pli sincera condolientscha.

2. Engaschis en la pleiv

Enteifer la communitad crisitiana sin territori da nossa vischnaunca havein nus ina liunga roscha da fideivlas collaboraturas e collaboraturs e quei duront pli liung temps ora. Nus havein in zun activ cussegl pastoral, fideivels e cunscienzius ugaus capluttas ed ina massa autras persunas che fan el zuppau ina gronda lavur ch'ins vesa insumma buca. Menziunar lessel era il Cussegl pastoral, sco era la lavur dallas calustras e calusters, dils ugaus capluttas e dils organists. Medemamein lessel punctuar la lavur che vegn prestada da biars voluntariamein duront igl onn ora.

Allas persunas engaschadas lessel far in compliment per tut lur lavur per il beinstar da nossa baselgia: Lecturas, catecheta e catechets, l'organisaziun entuorn mintga sepultura, ils organists, ils chors, ils dirigents dil chors, l'uniun da mummas e dunnas, l'uniun da giuventegna cun ornar l'intrada alla baselgia cun tschuppi e fluras, la musica instrumentala per embellir las fiastas e secapescha era tuttas persunas ch'orneschan e schubregian las baselgias.

En special lessel menziunar **Otto Cagienard** ch'ei dapi 1983, pia dapi 40 onns ugau dalla caplutta s. Bida e dalla Tegia da Nadels. En tut quels onns ha igl Otto organisau e fatg tut las lavurs ch'ei stadas necessarias en quei post. Ensemen cun **Guido Demund** permier han els schizun dau colur las Fassadas dalla caplutta. Otto ha fatg tut quellas lavurs vid la caplutta, la tegia e la seiv eav. cun grond plascher e satisfacziun e senza gronda canera. Quei cun cumpleina cuntentienscha dalla pleiv sur tut ils onns ora. Ils ugaus dallas capluttas vegnen buca indemnissai, aschia che Otto ha fatg tut quella lavur en quels 40 onns per in DIEUS PAGHI.

A Clau Scherrer e nossas catechetas Isabelle Defuns e Rilana Cadruvi Scherrer lessel jeu engraziar per lur grond engaschi. Els organiseschan adina puspei occasiuns nua ch'els affons stattan el center dil survetsch divin. Era all'uniun da mummas e dunnas engrazieli per tut lur engaschi. Ellas organiseschan il solver per ils affons suenter las messas da scola, han quitau dalla vestgadira dils premcommunicants

ed il bi usit dils retgs sco era per il lavar ora tut ils sanctuaris. Senza igl engaschi dallas mummas e dunnas fuss quei tut buca pusseivel! Era allas scolastas ed ils scolasts lessel jeu engraziar per lur engaschi cun ils affons en connex cun igl usit dils retgs. Era a nossas uguas e nos uguas caplutta s'auda ei in special engraziament, preparan els mintgmai las capluttas per il survetsch divin ed han quitau dalla facultad da mintga caplutta. Cun quei che nus havein per la caplutta Nossadunna dalla Neiv a Schlans negin ugau, procura dunna **Renata Pfister-Maissen** voluntariamein igl usitau quitau dalla caplutta.

Buca embldar d'engraziar lessel per las activitats entuorn las processions e sepulturas. A **Giusep ed Isabelle Defuns** per il riug da sepultura, allas **giuvnas** per il purtar la Nossadunna mintgamai da perdanonza sco era tut quels che **portan ils cafanuns** tier mintga fiasta. Alla **Suprastonza communal** deschi in cordial engraziament per purtar mintga fiasta ecclesiastica il balduchin. Aschia vegnan fiastas embellidas e la veta da cuminonza viva.

A gl'entir **Cussegl pastoral**, cun la zun engaschada presidenta **Isabelle Defuns**, actuara e las menadras ditgel in sincer engraziel fetg per lur bien sustegn da nies plevon. Nus havein in Cussegl pastoral che s'engascha cun tutta premura per il beinstar da nossa cuminonza.

3. Petgas da nossa cardientscha

a) Ductrina

Ella scola da Trun vegn dau ductrina en tuttas classas e cheutras tschentau in bien fundament religius per ils affons. L'instrucziun religiusa ei vegnida dada: emprema tochen quarta classa dalla catecheta **Isabelle Defuns-Gamboni**. Ella s'engascha era fetg cun ils affons per ils survetschs divins per famiglias. La 5. e 6. classa vegn instruida da **Rilana Cadruvi Scherrer** che prepara medemamein l'instrucziun dalla s. Creisma. Il scalem ault vegn instruius da **Stefan M. Bolli**.

b) Fatgs da Baselgia

Tuts ils fatgs da Baselgia vegnan menziunai el rapport dalla presidenta dil Cussegl pastoral.

c) Manteniment dils beins

Per gl'usitau manteniment dils baghetgs sacralis sco era tier las casas pervendas vegn igl administratur Benedetg Albin a dar plaid e fatg. Era ad el lessel jeu engraziar grondamein per siu immens engaschi.

4. Persunal

a) Lecturas e parter ora la s. communiun

Allas lecturas: **Annamaria Cavigelli-Tschuor, Gabi Cajacob-Mirer, Isabelle Defuns-Gamboni, Esther Tomaschett-Monn, Manuela Wolf-Tomaschett e Rilana Cadruvi Scherrer** per Trun, **Marta Bundi-Giger, Josefa Wolf-Tomaschett, Anita Orlik-Vincenz e Letizia Rensch-Tomaschett** per Zignau, engraziel cordialmein per lur buns survetschs ch'ellas fan dumengia per dumengia.

b) Organists

Cun **Clau Scherrer e Jacinta Jacomet-Lombriser** havein nus dus organists che emballeschan mintga dumengia il survetsch divin. Engraziel fetg persuenter.

A **Claudio Vincenz** engraziein nus cordialmein per la prontadad d'embellir dumengia per dumengia las s. messas cun musica sacrala en la baselgia da Zignau. Mo era als organists dil chor cecilian **Gieri Maissen e Flurin Monn** schein in sincer "Dieus paghi".

c) CalustrAs

Special engraziament admettel allas calustras ed als calusters: **Gabi e Georg Cajacob-Mirer** per la baselgia parochiala, **Letizia Rensch-Tomaschett** per la baselgia da Zignau sco era **Tarcisi Guldemann** per Nossadonna dalla Glisch. A Schlans ha **Georgina Flepp-Cahannes** dau giu il post da calustra, niev ha **Angelo ed Erica Cavegn-Pfister** surpriu. Era lessel engraziar a **Georg Cajacob** per sia prontadad da segidar en cass specials. Senza lur gronda lavur el zuppau funcziunas nies sistem buca. Ei vegn prestau bia e buna lavur nunveseivla, mo pauc da lur lavur ei enconuschenta allas parochianas e parochians.

5. Renconuschientscha ed engraziament

Tgei fuss ina cuminonza senza la lavur da biars funcziunariAs. Quella cuminonza essas vus che separticipais alla veta religiusa en nossa pleiv e caplania cun assister allas s. messas ni d'austras purschidas. Persuenter lessel admetter il duiv engraziament, sperond che nossa cuminonza resti activa era el temps da desinteress per la religiun, sco era per nossa Baselgia catolica romana. Nies zun premurau plevon sur Tomasz vegn sustenius digl engaschau cussegl pastoral e dallas catechetas Isabelle Defuns-Gamboni e Rilana Cadruvi Scherrer che fan in bien fundament, sin il qual nus savein baghegiar si nossas activitads cristianas.

In sincer e profund engraziament ei il minimum ch'jeu sai admetter a mes consuprastonts sco era alla revisura **Lea Alig-Flury** ed al revisur **Gion Friberg**.

Enten il rapport hai menziunau plirs engraziaments. Jeu sperel ch'jeu hai emblidau negin, sche quei fuss il cass, lessel seperstgisar tier quellas persunas ed engraziar en quei mument era a lezzas.

Sco finenziun lessel engraziar a vus, preziadas parochianas e parochians, che segideis adina puspei sin ina u l'otra moda morala ni finanziaia per il beinstar da nossa pleiv ni documenteis, entras vossa preschientscha, dumengia per dumengia vies interess per ils fatgs da nossa religiun e nossa pleiv.

Sco cuminonza sa la veta da pleiv mo exister cun il sustegn da bia mauns e sur da quels disponin nus aunc il mument. Per tut quei agid e sustegn seigi engraziau da tut cor.

Trun, avrel 2024

Pieder Decurtins, president